



Në mbështetje të nenit 5, paragrafi 1, nënparagrafi 1.1, pika 1.1.1, nenit 12 paragrafi 1, nënparagrafi 1.5 dhe nenit 22, paragrafi 3, të Ligjit Nr.08/L-017 për Agjencinë për Parandalimin e Korrupsionit, nenit 21 paragrafi 2 të Ligjit nr. 06/L-011, për Parandalimin e Konfliktit të Interesit në Ushtrimin e Funkcionit Publik, neni 11, paragrafi 4, i Rregullores Nr. 03/2023 për Procedurat për Hetimet Administrative në Agjencinë për Parandalimin e Korrupsionit, Drejtori i Agjencisë për Parandalimin e Korrupsionit, me datë 16.05.2025, nxjerrë këtë:

V E N D I M

- I. Mbyllet rasti me Nr. të proto.(APK-DPKI-06-244/25), për zyrtarin e lartë z. Nexhat Behrami, zv. Drejtor i Departamentit të Zjarrëfikjes dhe Shpëtimit, Agjencia e Menaxhimit Emergjent, për shkak se nuk ka prova të mjaftueshme që argumentojnë dyshimin e arsyeshëm për konflikt interesi në ushtrimin e funksionit publik.
- II. Ky vendim është përfundimtar në procedurën administrative dhe i njëjti publikohet në uebfaqen zyrtare të Agjencisë për Parandalimin e Korrupsionit.

A r s y e t i m

I. Agjencia për Parandalimin e Korrupsionit (në vijim: Agjencia) ka filluar trajtimin e këtij rasti pas pranimit të një denoncimi nga jashtë (në vijim: raportues i rastit), me pretendimin për konflikt të interesit pasi që, siç theksohet në kërkesë (citojmë):

"[...] U.D. i Drejtorit të Departamentit të Zjarrëfikjes ka punësuar edhe nipin e tij, po në këtë departament sipas konkursit M. V., për të cilin kemi parë se ka qenë edhe pjesë e komisionit duke përbërë konflikt të interesit dhe ushtrim ndikimi [...]"

Agjencia për Parandalimin e Korrupsionit konform mandatit dhe kompetencave ligjore që i ka sipas Ligjit Nr.08/-017 për Agjencinë për Parandalimin e Korrupsionit, ka zhvilluar hetim administrativ duke trajtuar dhe shqyrtuar pretendimet për konflikt të interesit, duke u bazuar në dispozitat e Ligjit për Parandalimin e Konfliktit të Interesit.

Me qëllim të sqarimit të plotë dhe të gjithanshëm të kësaj situate, fillimisht është zhvilluar një bisedë telefonike me Menaxherin e Personalit të Agjencisë së Menaxhimit Emergjent, ku i njëjti ka ofruar informacionin lidhur me konkursin me nr.RN0001356, për pozitën Zyrtar i lartë për Organizimin dhe Zhvillim të Zjarrëfikjes dhe Shpëtimit.

Ndërkohë, përmes shkresës zyrtare (APK-DPKI-06/25), drejtuar Agjencisë për Menaxhim Emergjent, është kërkuar dosja e konkursit me numër të referencës RN00013565, që lidhet me pozitën "Zyrtar i Lartë për Organizimin dhe Zhvillimin e Zjarrëfikjes dhe Shpëtimit".

Bazuar në dokumentacionin në dispozicion, konstatohet se kërkesa për shpalljen e konkursit për pozitën "Zyrtar i Lartë për Organizimin dhe Zhvillimin e Zjarrëfikjes dhe Shpëtimit", me numër reference RN00013565, është iniciuar nga zv. Drejtori i Departamentit të Zjarrëfikjes dhe Shpëtimit, dhe është aprovuar nga zv. Drejtori i Përgjithshme i Agjencisë për Menaxhim Emergjent.

Fillimisht, për të vërtetuar afërsinë eventuale familjare në mes të zv. Drejtorit të Departamentit të Zjarrëfikjes dhe Shpëtimit, Agjencia e Menaxhimit Emergjent z. Nexhat Behrami dhe zyrtarit M.V. të pretenduar nga raportuesi i rastit, Agjencia ka dërguar kërkesë me shkrim në Agjencinë për Regjistrimin Civil (ARC), dhe nga përgjigja e ARC-së (*shkresa zyrtare nr.: 02/421*) rezulton se (*citojmë nga shkresa e tyre*): "[...]. Ju njoftojmë se Nexhat BEHRAMI, me numër personal [...], dhe M. V., me numër personal [...], pas verifikimit në Regjistrin Civil nuk kemi arritur të vërejmë ndonjë lidhje familjare ne mes tyre[...]".

Duke marrë parasysh faktin se ARC si institucion kompetent i gjendjes civile, përkatësisht i verifikimit dhe vërtetimit të afërsisë familjare mes shtetasve të Republikës së Kosovës, ka konstatuar se, *nuk ka gjetur ndonjë lidhje familjare mes zyrtarit të lartë z. Nexhat Behrami dhe z. M.V.*, atëherë rrjedhimisht përjashtohet afërsia familjare e pretenduar nga raportuesi i rastit në mes të z. Nexhat Behrami dhe M.V..

Kështu, me nenin 6 të Ligjit për Parandalimin e Konfliktit të Interesit është përkufizuar nocioni i konfliktit të interesit, ashtu që:

"Konflikti i interesit lind nga një rrethanë në të cilën zyrtari ka interes privat, që ndikon, mund të ndikojë ose duket se ndikon në kryerjen me paanshmëri dhe objektivitet të detyrës së tij zyrtare".

Ndërsa me dispozitën e nenit 17 [*Deklarimi rast për rast i interesave private të zyrtarit*], paragrafi 1 i Ligjit për Parandalimin e Konfliktit të Interesit është përcaktuar se:

"Çdo zyrtar gjatë ushtrimit të funksionit të tij publik, në bazë të njohurive të tij dhe në mirëbesim, detyrohet që të bëjë vetëdeklarimin paraprak, rast për rast të ekzistencës së interesit të tij privat ose të personave të afërm me të lidhur me vendimmarrjen një çështje të caktuar, që mund të bëhet shkak për lindjen e një konflikti të interesit dhe të tërhiq nga kjo vendimmarrje."

Lidhur me nenin 3, paragrafi 1, nënparagrafi 1.2 të Ligjit për Parandalimin e Konfliktit të Interesit, me të cilin është përkufizuar se:

"Interesi privat i personit zyrtar - nënkupton çfarëdo përparësie për personin zyrtar, familjen e tij, të afërmit, miqtë dhe personat apo organizatat me të cilat ai ka pasur apo ka marrëdhënie afariste",

si dhe me nënparagrafin 1.6 të këtij nenin me të cilin është përkufizuar se:

"person i afërm me zyrtarin është bashkëshorti ose personi që bashkëjeton, të afërmit në vijë të drejtë të gjakut pa kufizime, të afërmit në vijë të tërthortë deri në shkallën e katërt, adoptuesi, i adoptuari, i afërmi në gjini të krushqisë deri në shkallën e dytë si dhe çdo person fizik apo juridik i cili ka pasur ose ka një lidhje të përbashkët interesi privat pasuror ose jopasuror me zyrtarin. [...]."

Ndërsa dispozita e nenit 3, paragrafi 1, nënparagrafi 1.12 të Ligjit për Parandalimin e Konfliktit të Interesit, e definojnë nocionin vendimmarrje si:

"çasti i fundit i procesit vendimmarrës gjatë të cilit vendoset përmbajtja përfundimtare e aktit apo kontratës si dhe ato çaste paraprake të vendimmarrjes të cilat janë thelbësore dhe përcaktuese në të cilat pjesëmarrja, ndikimi dhe qëndrimi i zyrtarit përcaktojnë përmbajtjen përfundimtare të aktit apo kontratës si dhe çdo veprim i zyrtarit në ushtrimin e funksionit publik."

Pra, konflikti i interesit është i lidhur ngushtë me procesin e vendimmarrjes apo çasteve paraprake të vendimmarrjes, nën kushtet e ekzistencës së interesit privat të zyrtarit apo të personave të afërm me të në një çështje të caktuar. Për tu konstatuar konflikti i interesit në një çështje të caktuar, duhet të plotësohen kushtet thelbësore (kumulative) të tij, siç është vendimmarrja apo çastet paraprake të vendimmarrjes si dhe interesi privat i zyrtarit ose i personave të afërm me zyrtarin.

Sikurse u konstatua mësipër, në rastin konkret nuk është vërtetuar afërsia familjare në kuptim të dispozitave përkatëse të Ligjit për Parandalimin e Konfliktit të Interesit, prandaj Agjencia konstaton se në rastet kur nuk plotësohet (përmbushet) njëri nga kushtet e domosdoshme kumulative të konfliktit të interesit, siç është *interesi privat i zyrtarit ose i personave të afërm me zyrtarin* në rastin konkret, përjashtohet konflikti i interesit sipas dispozitave të Ligjit për Parandalimin e Konfliktit të Interesit.

II. Agjencia vendosi si në pikën II. të dispozitivit të këtij vendimi, duke u bazuar në nenin 22 [Procedura administrative e Agjencisë për rastet e konfliktit të interesit], paragrafi 12 të Ligjit për Parandalimin e Konfliktit të Interesit, me të cilin është përcaktuar se: *"Të gjitha vendimet që i nxjerr Agjencia lidhur me konfliktin e interesit në ushtrimin e funksionit publik dhe shkeljen e dispozitave të këtij ligji, përfshirë veprimet e ndaluara ose të kufizuara në ushtrimin e funksionit publik, ushtrimin e veprimtarive të tjera, papajtueshmëritë në ushtrimin e funksionit publik, duhet të respektohen nga zyrtarët dhe institucionet përgjegjëse. Ato bëhen publike në faqen zyrtare të internetit të Agjencisë."*, si dhe paragrafin 15 të këtij neni, me të cilin është përcaktuar se: *"Vendimet e Agjencisë në lidhje me konfliktin e interesit janë përfundimtare në procedurë administrative."*

Nga sa u tha më lartë, u vendos si në dispozitiv të këtij vendimi.

Vendimi iu dërgohet:

- Zyrtarit të lartë publik
- Drejtorit të DPKI-së
- Z./znj. (zyrtarit përgjegjës)


YLLI BULESHKAJ
Drejtore i Agjencisë për
Parandalimin e Korrupsionit